

Ne kearl zonder kop?

Bats, met een vaartje vloog de nendeure teggen den hoop knollen dee op de deale leien. De kolde wind blees naar binnen en mien breurke smet de fietse dale en schreeuwen 't oet: Ik hebbe wat ezeene: Ne kearl zonder kop!! O papa, ik bun zo eschrokken en ok zo bange!

Mien vader kwam noo onder de koo vandan en ging rechtop tussen de stavassels staon: En noo rustig, earst den nendeure dichte en dan nog ne maol: Wat is d'r gebeurd?

Een betje gekalmeerd begon mien breur: Het koor was afgelopen en ik fietsten good an de rechterkante naar hoes. Zo ongeveer bi-j boer Harbers botsten ik haost teggen ne helen groten kearl op. Hee had gin kop, maor toch konne praoten. Hee schreeuwen: Hee kleinen bözzel, de lampe d'r op! En toen ik umme kek was e recht van boaven; hee had ginnen kop....En plietsie was e ok neet; dee hebt ne pette op. Zozo, zei mien va, haj gin lech op de fietse? Nea, dat is al ne wekke kapot en daorumme was den reus ok zo kwaod! Noa, ik gao met, zei mien va. Wi-j gaot um zeuken; ne kearl zonder kop wil ik ok zeen.

An mien mooder vroeg e of zee 't melken af wol maken en met mien breurken achterop jogen ze weg op Beltrum an. Mien va had wal lech op de fietse en mien breurken mos met de zaklöchte schienen en ja endluks bi-j Molendijk, de loonwerker zagen ze wat lopen. Mien va d'r lieke op af en hee zag 't meteene: Jans de naober met ne groten mealzak op d'n nekke. Goeienaovend Jans, wat loop ie hier te oazen, kan ik oe helpen en wat is d'r gebeurd? Jans, haost boeten aosem van dat gedootte met den zak zei: Ik was nog gauw naar de ABTB egaone um poggenmeal te halen en toen zal ik 't wal te hard op de fietse estoekt hebben en den brak mi-j an tweeën. Dat olde kreng hek laoten staon en toen bun ik gaon lopen, maor met zo'n 50 kilo op den nekke, dat völt neet met! En toen fietsten d'r mi-j ok nog zonnen opschötteling haost van de sokke....man ik bleef kwelke op de beene. Ik schrokke mi-j kapot, kleinen verrekkeling!

Den kleinen ken ie wal, ik heb hem hier bi-j mie. Den schrok minstens zo hard as ie en kwam geheel veraltereard de deale op vleege. Maor ik wet 't good emakt: Leg oewen zak meal hier oaver 't zadel en 't spatboard en dan loope wi-j met zien dreeën op hoes an. Kunne wi-j allemaole oethechten en bi-j kommen; foi wat ne schrik!

Jans, weet ie ,hoe hee oe neumen? De kearl zonder kop. En earlijk daar was ik ok wal beni-jd naar! Dat lek natuurlijk ok zo in dat schiensel van de maone.

Jans kocht ne ni-je tweedehandse fietse; mien va repareerde 't lech en in de buurte kwam de kearl zonder kop geregeld langs.